

不服若取服舜元而後推賢範則必遲緩矣賢範舜元並一時
刑推可也○傳于政院曰天文看候事前者以金遂性安琰專
委為之矣今不必抄他負也令成世昌率觀象監官負占候可
也○戶曹判書曹繼商啓曰臣資品庸劣近又病重行步甚艱
况年過致仕不能堪煩劇之地請致仕傳曰卿雖過致仕之年
豈不可為堪任乎勿辭○夜南方異乃東方有氣如火○丙寅
以金克成為議政府右議政黃琛為工曹判書權撥為漢城府
左尹史臣曰光弼年德非克成所可擬也上之所教聞見有
誤也殷輔等不明言其不然而固執更請並陳物望已歸一啓
乃已遂以克成書啓其所啓之意不在於誠苟且為之初非欲
置光弼於已右也○夜彗星見於酉地長三丈許色白流星出
華蓋星入天牢星狀如鉞尾長二尺許色白○丁卯憲府啓曰
工曹判書黃琛以武人為二品物望尚賤陞為六卿恐名器自
此遂輕請改正同知中樞府事李亨順性行殘虐貪黷專事剝
割以肥其身又務諂事前為會寧府使時與胡人恣行買賣將